

NASIONAL

'Chin Chin anak sulung saya'

Ibu tunggal anggap sahabat seperti darah daging sendiri

HASNIZA HUSSAIN

KUALA LUMPUR

"Kami bersahabat tetapi dia ibarat anak sulung saya," kata Jameyah Sheriff, 59, yang jasanya diiktiraf apabila terpilih menerima Anugerah My Hero 3.0 baru-baru ini.

Ibu tunggal itu berkata, dia berkenalan dengan Tan Chin Chin, 37, ketika mereka menuntut di Universiti Sains Malaysia (USM) kira-kira 18 tahun lalu.

Menurutnya, banyak saat suka dan duka mereka hadapi bersama walaupun berlainan kaum dan tiada pertalian darah.

Mengimbas kembali detik perkenalan mereka, Jameyah berkata, sewaktu minggu pertama kuliah pada 2003, pensyarah memaklumkan terdapat seorang pelajar orang kurang upaya (OKU) yang memerlukan bantuan pengangkutan ke kuliah dan bertanyakan jika ada sesiapa yang boleh membantu.

Beliau berkata, selepas tiga hari, belum ada individu menawarkan diri untuk membantu sehinggalah pelajar OKU tersebut iaitu Chin Chin yang menghidap cerebral palsy tampil meminta bantuan di hadapan kelas.

"Apabila melihat fizikal Chin Chin, saya rasa sebak dan fikir perlu bantu dia. Jadi, saya terus tawarkan diri dan sejak itu bermula rutin harian saya men-



jemput dan mengantar dia ke kelas, perpustakaan, belikan makanan atau bawa dia bersarapan dan ke mana-mana sahaja.

"Pada mulanya saya akui, memang bantu kerana simpati tetapi lama kelamaan saya anggap sebagai satu tanggungjawab yang perlu dilakukan bagi meringankan beban Chin Chin dan keluarga.

"Tambahan pula, ketika itu dia sangat muda, baru berusia 20 tahun dan saya pula 42 tahun. Sudah tentu dia sangat perlukan sokongan orang lain," katanya.

Inspirasi

Jameyah berkata, kegigihan Chin Chin yang tidak menjadikan kekurangan diri sebagai penghalang untuk belajar dan berjaya memberikan inspirasi.

Beliau berkata, jika hanya melihat kepada fizikal Chin Chin, pasti ramai yang tidak percaya akan kebolehan dan kebiasaan wanita itu.



KENANGAN... Jameyah (tiga dari kanan) dan empat lagi penerima anugerah My Hero 3.0 bergambar bersama isteri Perdana Menteri, Tun Dr Siti Hasmah Mohd Ali dan Presiden KLSCCCI, Tan Sri Ter Leong Yap (empat dari kanan) di Wisma Chinese Chamber, Kuala Lumpur baru-baru ini.

"Tapi jika anda melihatnya seperti mana saya melihat dan mengenalinya, saya yakin anda akan mengakui kehebatan seorang OKU yang mungkin jauh lebih baik daripada diri anda sendiri.

"Dia ada usaha dan tekad yang sangat hebat untuk belajar sehingga ke universiti, malah merupakan pelajar yang sangat cemerlang dan sering menjadi pelajar terbaik ketika di universiti dahulu," katanya.

Jelasnya, sudah hampir 10 tahun Chin Chin menjadi pegawai penyelidik di USM dan mereka kekal akrab seperti dahulu.

Katanya, bantuan kecil yang diberikan kepada Chin Chin sepanjang mereka belajar bersama bukan apa-apa jika hendak dibandingkan dengan kejayaan Chin Chin pada hari ini.

"Kejayaan dicapai Chin Chin lebih bermakna dan sangat membanggakan saya, apatah lagi ibunya. Bukan kerana bantuan kecil saya membolehkan dia ber-

jaya tetapi kegigihan dia untuk mencapai cita-cita yang meletakkan dia di tempat sekarang," katanya.

Jameyah berkata, walaupun Chin Chin mempunyai masalah pertuturan, dia sebenarnya seorang yang sangat peramah dan suka berbual.

"Kami selalu berbincang dan kadang-kadang berdebat tentang pelbagai isu. Dia hanya mengalami masalah pertuturan tapi masih boleh menulis dan menaip seperti orang normal.

"Saya harap masyarakat dapat menerima OKU seperti Chin Chin sebagai salah seorang anggota masyarakat yang produktif serta dapat menyumbang kepada keharmonian dan kesejahteraan negara," katanya.

Terharu

Mengulas berhubung Anugerah My Hero 3.0 yang diterimanya, Jameyah mengakui sa-

ngat terharu dan gembira dengan pengiktirafan tersebut.

Namun, beliau tidak menganggap anugerah itu hanya untuk dirinya semata-mata tetapi pengiktirafan buat rakan-rakan lain yang turut prihatin dengan kehidupan masyarakat sekeliling.

"Pengiktirafan ini bukanlah sebab utama kenapa saya terlibat dalam kerja-kerja sukarela tetapi dengan anugerah ini, saya harap dapat membuka mata masyarakat tentang pentingnya sikap prihatin dalam diri agar bantuan dapat diberikan kepada sesiapa sahaja," katanya yang masih aktif sebagai sukarelawan.

Selain Jameyah, terdapat empat penerima Anugerah My Hero 3.0 iaitu Md Herman Saidin, Richard Wong Yew King, pasangan Cheah Kim Hock dan V Rajendran serta Dr Norzah Abd Ghani.

Kesemua mereka membawa pulang wang tunai RM5,000, trofi dan sijil penghargaan serta dilantik menjadi Duta Perpaduan oleh Jabatan Perpaduan Negara dan Integrasi Nasional (JPNIN).

Anugerah My Hero ialah program kerjasama antara Dewan Perniagaan dan Perindustrian Cina Kuala Lumpur dan Selangor (KLSCCCI) bersama JPNIN bagi mengiktiraf dan menghargai individu yang banyak berkorban serta berjasa dalam usaha meningkatkan perpaduan masyarakat pelbagai kaum di Malaysia.

Akhbar Sinar Harian, Utusan Borneo, See Hua Daily News, The Borneo Post, Orizon, The Sun dan Tamil Malar adalah rakan media rasmi untuk anugerah itu.



Jameyah (duduk, kiri) dan Chin Chin (duduk, kanan) meluangkan masa bersama sahabat-sahabat mereka.



Chin Chin (kanan) gembira Jameyah (kiri) yang banyak membantunya sejak menuntut di USM 18 tahun lalu terpilih menerima Anugerah My Hero 3.0.

NASIONAL

Richard komited bantu gelandangan, orang asli

Salur pelbagai bantuan untuk golongan memerlukan

HASNIZA HUSSAIN

SHAH ALAM

Melihat senyuman orang yang dibantu sudah beri kepuasan tak terhingga buat saya,” kata Richard Wong, 42, yang terpilih menerima Anugerah My Hero 3.0 di Kuala Lumpur baru-baru ini.

Katanya, beliau gembira dapat melakukan kerja amal dengan membantu gelandangan dan masyarakat orang asli.

Menurutnya, beliau menjalankan aktiviti itu bersama rakan-rakan yang digelarkan sebagai kumpulan Food For Gelandangan (FFG).

“Kami bukan NGO (pertubuhan bukan kerajaan) tetapi kami bergerak sebagai satu kumpulan yang berkongsi dan ada minat sama untuk buat kerja sukarela serta bekerjasama dengan banyak NGO lain dalam mencari penyelesaian untuk menangani isu gelandangan.

“Program bantuan yang kami berikan pada awalnya adalah makanan panas tetapi ia didapati kurang praktikal. Kami tukarkan dengan beri mereka makanan



Richard turut memberikan khidmat gunting rambut kepada gelandangan.

kering seperti biskut, buah dan sebagainya,” katanya.

Bapa kepada tiga anak itu berkata, program penyaluran bantuan itu kemudiannya berkembang menerusi pelbagai jenis bantuan lain.

Menurutnya, bantuan menerusi FFG turut dibuat dalam bentuk pemberian barang mandi, pakaian, khidmat perubatan, program baca buku dan khidmat gunting rambut.

“Kami buat perubahan atau penambahbaikan bantuan yang diberikan dari masa ke masa dan dapat melihat impaknya kepada warga gelandangan. Alhamdulillah, program yang kita buat setiap dua minggu ini memang dapat membantu mereka.

“Begin juga dengan masyarakat orang asli. Kami bantu dengan mencari orang asli yang tinggal di pedalaman Hulu Perak yang memang tidak pernah dapat bantuan, buta huruf dan pemalu,” katanya yang sudah tujuh tahun memeluk Islam.

Belajar

Richard yang merupakan bekas pelajar Maktab Tentera Diraja (MTD) berkata, beliau sentiasa belajar dan memperkayakan diri dengan pelbagai ilmu daripada bidang berlainan.

“Saya pernah belajar bidang Kejuruteraan Elektrik dan Komputer di Monash University, Australia dan baru menamatkan pe-

FOTO: ROSLI TALIB DAN FB FFG



Richard (berdiri, tiga dari kanan) bersama rakan-rakan FFG yang sentiasa bersamanya dalam menjalankan kerja-kerja amal bagi membantu gelandangan di ibu negara.

ngajian dalam bidang undang-undang di University of London. Kini saya merancang untuk belajar dalam bidang perubatan pula.

“Saya tidak belajar semua ini untuk jadi doktor, peguam atau jurutera tetapi saya mahu dapatkan sebanyak ilmu yang boleh dengan mempelajari pelbagai bidang profesional, selain memperbaiki diri serta daya pemikiran supaya mampu menjadi strategis yang pandai menyelesaikan masalah masyarakat Malaysia,” katanya.

Tanggungjawab

Terpilih sebagai penerima Anugerah My Hero 3.0, sekali gus dilantik sebagai Duta Perpaduan menjadikan Richard lebih bersemangat untuk meneruskan apa yang dilakukannya selama ini.

Menurutnya, beliau sangat terkejut apabila diumumkan sebagai penerima anugerah tersebut kerana calon lain dilihat lebih berkaliber.

“Bukan mahu merendah diri

tetapi saya rasa kerdi kerdi kerana apa yang dilakukan calon lain serta kredibiliti oleh dimiliki mereka jauh lebih baik daripada saya.

“Namun, saya bersyukur dengan pengiktirafan ini dan menganggap ia satu tanggungjawab yang besar kerana bukan mudah untuk menjadi Duta Perpaduan,” katanya.

Anak kelahiran Petaling Jaya itu berkata, beliau sangat berharap dapat mengubah stigma perpaduan yang sebelum ini hanya dikaitkan dengan bangsa dan agama.

Menurutnya, terdapat tiga lagi perkara yang seharusnya dilihat semua pihak iaitu ketidakseimbangan berkaitan faktor usia, jantina dan darat.

“Tiga perkara tambahan ini harus dipandang serius dan diselesaikan, jika tidak ia juga boleh



Richard (duduk kiri) bersama empat penerima anugerah My Hero 3.0 lain bergambar bersama isteri Perdana Menteri, Tun Dr Siti Hasmah Mohd Ali (tengah) dan Presiden KLSCCCI, Tan Sri Ter Leong Yap (empat dari kanan) di Wisma Chinese Chamber, Kuala Lumpur baru-baru ini.

memecahbelahkan perpaduan sedia ada,” katanya.

Sementara itu, Pengurus Pengaturan Anugerah My Hero 3.0 merangkap Pengurus Jawatankuasa Perpaduan Negara Dewan Perniagaan dan Perindustrian Cina Kuala Lumpur dan Selangor (KLSCCCI), Datuk Richard Lau Chi Chiang berkata, rakyat Malaysia seharusnya bersatu dan saling membantu tanpa mengira kaum atau agama untuk masa hadapan yang lebih cerah.

Menurutnya, jawatankuasa pengajur berharap masyarakat akan lebih memahami dan prihatin terhadap golongan gelandangan.

“Kami harap Richard akan terus memberikan platform dan peluang kepada masyarakat untuk melakukan aktiviti kebajikan bersamanya,” katanya.

NASIONAL

Herman buat kerja dari hati

Kunci kejayaan OKU pendengaran yang komited menjalankan kerja amal

HASNIZA HUSSAIN

SHAH ALAM

Buat kerja dari hati' merupakan kunci utama kejayaan seorang orang kurang upaya (OKU) pendengaran yang begitu komited menjalankan kerja-kerja amal bagi membantu golongan OKU yang lain.

Md Herman Saidin, 38, berkata, itulah prinsip yang dipegangnya selama 28 tahun terlibat dalam aktiviti khidmat sosial.

Menurutnya, beliau percaya setiap kebaikan yang dilakukan itu tidak perlu ditunjuk-tunjuk.

"Buat dengan ikhlas dari hati kerana ALLAH SWT lebih mengetahui apa yang kita lakukan."

"Dapat anugerah atau tidak bukan perkara utama kerana kita tetap sama dalam masyarakat," katanya yang menjadi antara lima penerima Anugerah My Hero 3.0 baru-baru ini.

Namun katanya, beliau tetap bersyukur dengan pengiktirafan yang diterima dan berterima kasih kepada pihak yang mencalonkannya untuk menerima anugerah tersebut.

Aktif bantu anak kampung

Bercerita lanjut mengenai kerja amal yang dilakukannya, Md Herman berkata, beliau lebih banyak menumpukan kepada usaha untuk membantu anak-anak OKU di kampung halamanya di Labuan, Sabah untuk mempelajari bahasa isyarat.

Menurutnya, pada peringkat awal, beliau sendiri mempelajari bahasa isyarat daripada seorang individu termasuk mengikuti modul-modul kelas bahasa isyarat yang dianjurkan Persatuan Bagi Orang-Orang Istimewa Labuan dan Persatuan Orang Pekak Labuan.



Herman (duduk, lima dari kiri) bukan hanya menerapkan pembelajaran bahasa isyarat kepada golongan OKU tetapi turut mendedahkan mereka dengan pelbagai program lain.

PERTANDINGAN ESEI MYHERO

- Pelajar digalakkan untuk menghayati nilai-nilai murni berdasarkan Kisah Penerima Anugerah MyHero.
- Tarikh tutup penyertaan pada 22 November 2019
- Untuk maklumat lanjut, sila layari www.facebook.com/myheroaward

"Selepas tamat sekolah menengah, saya mula aktif dalam persatuan dan membantu rakan OKU mengajar asas bahasa isyarat sebelum belajar dengan lebih mendalam tentang bahasa isyarat di Persekutuan Orang Pekak Malaysia (MFD).

"Saya kemudiannya menjadi juruba-hasa isyarat di Persatuan Orang Pekak Kuala Lumpur dan mengambil masa hampir tiga tahun untuk menguasai sepenuhnya kemahiran tersebut," katanya.

Berbekalkan ilmu yang dimiliki, Md Herman tekad membantu anak-anak OKU pekak di Labuan dengan mengajar mereka bahasa isyarat yang standard supaya lebih mudah untuk mereka berkomunikasi dan mencari kerja.

Anak kedua daripada tujuh beradik itu berkata, sehingga kini beliau berjaya membimbing seramai 20 OKU untuk belajar bahasa isyarat dan lebih daripada 20 orang kini mempunyai kerja masing-masing.

"Semuanya dibantu melalui Persatuan Bagi Orang-Orang Istimewa Labuan dan Persatuan Orang Pekak Labuan," katanya yang memperoleh banyak inspirasi daripada ibunya, Fatimah Yahya, 60.



Md Herman (tengah) mengajar bahasa isyarat kepada anak-anak OKU.



Md Herman (duduk, dua dari kiri) bersama empat penerima anugerah My Hero 3.0 lain bergambar bersama isteri Perdana Menteri, Tun Dr Siti Hasmah Mohd Ali (tengah) dan Presiden KLSCCCI, Tan Sri Ter Leong Yap (empat dari kanan) di Wisma Chinese Chamber, Kuala Lumpur baru-baru ini.



**ANUGERAH
MY HERO
AWARD**
英雄奖
மைஹோரோ
விருது

3.0

ANJURAN BERSAMA
隆雪中总
KLSCCCI
DISOKONG OLEH
JABATAN PERPADUAN NEGARA DAN INTEGRASI NASIONAL
JABATAN PERDAWA MENTERI
PENAJA PRESTIJ
中国银行
BANK OF CHINA
RAKAN MEDIA
媒体伙伴
ORIZON SCREENS
theSun
Sinar

FOTO: ROSLI TALIB DAN FACEBOOK SEMOA EDUCARE CENTRE

Bakti 2 sahabat berlainan bangsa

Tubuhkan asrama OAEC yang khusus untuk membantu kanak-kanak orang asli

HASNIZA HUSSAIN

SHAH ALAM

Persahabatan yang terjalin antara dua individu berlainan bangsa sejak lebih 30 tahun lalu begitu erat sehingga mereka memutuskan untuk bersama-sama menabur bakti kepada komuniti.

V Rajendran, 62, dan Cheah Kim Hock, 57, yang mula berkenalan ketika mereka belajar di sebuah kolej di Kuala Lumpur berganding bahu membantu kanak-kanak orang asli untuk mendapatkan pendidikan yang lebih baik, sekali gus keluar daripada kepompong kemiskinan.

Dua sahabat itu menujuhkan sebuah asrama dikenali sebagai Orang Asli Education Centre (OAEC) yang khusus untuk membantu kanak-kanak orang asli supaya mereka lebih berdikari dan berjaya terutama dalam pendidikan.

Rajendran berkata, beliau dan Kim Hock mendapat inspirasi untuk membantu kanak-kanak orang asli selepas menyertai satu lawatan ke perkampungan orang asli di Perak.

Menurutnya, keadaan anak orang asli yang terbiar, tidak belajar dan kurang pendedahan daripada ibu bapa terhadap kepentingan pendidikan menyebabkan mereka berdua berasaskan perlu melakukan sesuatu.

"Pada 2002, kami pergi ke perkampungan orang asli di Sungai Dalam, Raub, Pahang dan di sana kami mula mengajar anak-anak mereka pendidikan asas seperti mengenal abjad, angka, menulis dan mengira selama dua tahun.

Rajendran (kiri) dan Kim Hock merupakan dua daripada lima penerima Anugerah MyHero 3.0 yang berlangsung di Wisma Chinese Chamber, Kuala Lumpur baru-baru ini.



Rajendran (duduk paling kanan) dan Kim Hock (duduk, dua dari kanan) serta empat lagi penerima Anugerah MyHero 3.0 bergambar bersama isteri Perdana Menteri, Tun Dr Sri Hasmah Mohd Ali (berdiri di tengah) dan Presiden Dewan Perniagaan dan Perindustrian Cina Kuala Lumpur dan Selangor (KLSCCCI), Tan Sri Ter Leong Yap (berdiri, empat dari kanan) selepas penyampaian Anugerah MyHero 3.0 di Kuala Lumpur baru-baru ini.

"Pada 2004 pula, kami bawa seramai 20 anak orang asli keluar dari kampung tersebut ke pekan berdekatan yang terletak kira-kira enam kilometer untuk mendaftar mereka masuk ke sebuah sekolah rendah Cina di Pekan Sang Lee, Raub.

"Ketika itu kami sewa sebuah rumah untuk dijadikan asrama untuk kanak-kanak tersebut," katanya kepada *Sinar Harian* di sini baru-baru ini.

Bina asrama

Namun, Rajendran berkata, selepas dua tahun mereka terpaksa berpindah keluar kerana rumah yang disewa itu dijual oleh pemiliknya.

Menurutnya, beliau dan Kim Hock kemudiannya membeli tanah seluas 2.4 hektar di Tras, Raub pada 2010 yang terletak kira-kira 10 kilometer dari asrama lama.

"Dua setengah ekar daripada tanah tersebut kami bina asrama pelajar lelaki dan perempuan, de-

wan, perpustakaan dan beberapa kemudahan lain termasuk kolam ikan untuk memelihara ikan keli dan tilapia.

"Kini selepas 19 tahun, kami ada seramai 92 anak orang asli berusia antara lima hingga 17 tahun. Kebanyakan mereka berbasal dari beberapa negeri termasuk Sarawak.

"Mereka dihantar bersekolah di enam sekolah rendah dan menengah di sekitar Raub," katanya.

Lebih membanggakan, seramai 11 anak orang asli di bawah jagaan Rajendran dan Kim Hock sebelum ini sedang melanjutkan pelajaran di Tunku Abdul Rahman (TAR) University College, Universiti Teknologi Mara (UiTM) dan beberapa kolej komuniti di sekitar Lembah Klang.

Jana pendapatan

Kim Hock pula berkata, mereka memerlukan kira-kira RM35,000 sebulan bagi menguruskan semua perbelanjaan di asrama termasuk urusan pelajaran dan pengangkutan ke sekolah.

"Ini cabaran yang kami hadapi setiap bulan kerana duit perbelanjaan ini datang daripada sumbangan orang ramai dan tajaan pihak tertentu.

"Kami sering tidak cukup wang tetapi

pi kami akan pastikan anak orang asli yang kami jaga tetap dapat makan dan belajar setiap bulan.

"Niat kami buat kerja amal dan berharap lebih ramai tampil untuk membantu," katanya.

Tidak harap balasan

SEMENTARA itu, mengulas mengenai Anugerah MyHero 3.0 yang diterima mereka baru-baru, Rajendran dan Kim Hock mengakui terkejut apabila dipilih sebagai antara lima calon terbaik untuk menerima anugerah tersebut.

Rajendran berkata, sebelum itu ada seorang rakan mereka yang datang ke asrama dan memaklumkan mahu mencalonkan mereka berdua untuk anugerah berkenaan.

"Kami segan juga kerana kami buat kerja ini ikhlas, bukan untuk dapat balasan atau ganjaran.

"Namun, dengan pengiktirafan tidak dijangka ini, kami harap dapat membuka mata ramai pihak untuk sama-sama

Pertandingan Esei MyHero

- Pelajar digalakkan untuk menghayati nilai-nilai murni berdasarkan Kisah Penerima Anugerah MyHero.
- Tarikh tutup penyertaan pada 22 November 2019
- Untuk maklumat lanjut, sila layari www.facebook.com/myheroaward

Menurut Kim Hock, pihaknya turut memanfaatkan baki tanah yang dibeli sebelum ini untuk menanam pokok durian dan pisang.

"Hasilnya dijual untuk menjana pendapatan bagi menampung perbelanjaan di asrama.

"Kami juga buka gerai jualan burger, pisang goreng, cucur udang dan air," katanya.



Anak orang asli yang menduduki peperiksaan Ujian Pencapalan Sekolah Rendah 2019 disediakan tuisyen atau latihan secara berkumpulan di asrama.

NASIONAL

Sanggup gadai nyawa demi pelajar

Cikgu Norzah selamatkan pelajar daripada diserang lelaki amuk

ROSHLAWATY RAIH

KUALA LUMPUR

Tanpa mengira bangsa, seorang guru sanggup menggadaikan nyawa demi menyelamatkan pelajarnya di Sekolah Menengah Jenis Kebangsaan (SMJK) Yoke Kuan, Sekinchan, 20 tahun lalu daripada diserang lelaki amuk yang bersenjata parang.

Norzah Abdul Ghani, 55, atau lebih dikenali sebagai Cikgu Norzah diangkat sebagai wirawati bagi Anugerah My Hero 3.0 baru-baru ini.

Bercerita lanjut mengenai kejadian itu, beliau berkata, tiada apa yang difikirkan kecuali mahu menyelamatkan pelajar daripada bahaya lelaki amuk.

"Keselamatan pelajar saya lagi penting daripada diri saya sendiri. Walaupun perlu bergelut, saya sanggup asalkan mereka selamat," katanya.

Menurutnya, majoriti pelajar SMJK Yoke Kuan, Sekinchan adalah kaum Cina dan mereka dianggap sebagai anak sendiri oleh guru yang mengajar Pendidikan Jasmani dan bahasa Melayu itu.

"Saya dah 18 tahun mengajar di sekolah itu. Semua guru dan pelajar juga sangat rapat dengan saya. Sebab itu, bila berlaku peristiwa lelaki amuk itu, soal bangsa saya tolak tepi. Yang penting, anak-anak didik saya selamat," katanya.

Berkongsi tragedi yang berlaku 20 tahun dahulu, Cikgu Norzah berkata, ketika itu usianya baru sahaja menjengah 35 tahun.

"Ketika itu, saya berada di bangunan atas dan pekarangan sekolah agak sibuk dengan pelajar yang baru datang ke sekolah dan ada yang mahu pulang ke rumah.

"Sewaktu turun ke bawah, tiba-tiba



Cikgu Norzah ketika berkhidmat di SMJK Yoke Kuan, Sekinchan 20 tahun lalu.

Pertandingan Esei MyHero

- Pelajar digalakkan untuk menghayati nilai-nilai murni berdasarkan Kisah Penerima Anugerah MyHero.
- Tarikh tutup penyertaan pada 22 November 2019
- Untuk maklumat lanjut, sila layari www.facebook.com/myheroaward

saya terdengar jeritan, kemudian saya nampak seorang lelaki membakar motosikal dan membawa parang panjang," katanya yang memilih bersara pilihan dan kini aktif dengan NGO sendiri, MindRevolutions.

Dia berkata, lelaki yang bertubuh besar dan memakai jaket serta helmet itu berjalan menuju ke kelas sebelum menetak beberapa pelajar.

"Demi keselamatan pelajar, saya memberanikan diri menghadapi pengamuk tersebut seorang diri. Saya yakin, dengan cara itu, guru dan pelajar lain berkesempatan menyelamatkan diri masing-masing," katanya.

Cikgu Norzah mula berkomunikasi



Cikgu Norzah yang bercuti di London dikunjungi bekas pelajarnya yang melanjutkan pelajaran di negara itu.

dengan nada perlahan dan mengajak lelaki itu ke kantin kerana di sana tiada pelajar.

"Melihatkan pengamuk berada dalam keadaan tenang, saya cuba bercakap dalam bahasa Cina... 'koko shen me shi' (abang apaah ahpalah).

"Tetapi, lelaki itu tak peduli dengan pertanyaan saya dan dia cuba menyerang saya dengan parang sehingga membuatkan saya lari mengelilingi meja.

ANUGERAH MY HERO AWARD 英雄奖 மையர்ஹோ விருது 3.0 #KITALAH MALAYSIA

ANJURAN BERSAMA 联办单位
隆雪中总 KLSCCI 南洋商报 NANYANG SIANG PAU

DISOKONG OLEH 支持单位
JABATAN PERPADUAN NEGARA DAN INTEGRASI NASIONAL JABATAN PENDANA MENTERI

PENAJA PRESTIJ 尊贵赞助商
中國銀行 BANK OF CHINA

PENAJA 赞助商
SUNSURIJA Building Today Creating Tomorrow 征阳集团

RAKAN MEDIA 媒体伙伴
ORIZON SCREENS Sinar theSun தமிழ்மலர்

"Dek keletihan kerana aksi mengejar, pengamuk terduduk di bangku kantin dan saya menawarkan dua botol sarsi sebagai usaha memujuknya," katanya.

Beliau berkata, beliau akhirnya terpaksa menggunakan *reverse psychology* dengan menyokong lelaki amuk itu untuk meredakan keadaan.

"Saya berusaha meyakinkannya bahawa saya dipihaknya dan meminta

parang untuk meneruskan 'perjuangan'. Dia hampir menyerahkan senjata tetapi tidak jadi selepas mendengar suara beberapa ibu bapa yang panik menjerit," katanya.

Menurutnya, bagaimanapun akhirnya lelaki itu berjaya ditangkap oleh polis.

Selepas kejadian tersebut, Cikgu Norzah dan beberapa guru yang terlibat menerima sijil penghargaan daripada Kementerian Pendidikan (KPM).

Lima individu dipilih terima Anugerah MyHero 3.0

PADA majlis Anugerah MyHero 3.0 di Wisma Chamber baru-baru ini, sebanyak 13 pencalonan berjaya ke peringkat akhir dan lima individu terpilih menerima Anugerah MyHero 3.0 atas sumbangan mereka kepada masyarakat.

Penerima anugerah itu terdiri daripada Jameyah Sheriff, Md Herman Saidin, Richard

Wong Yew King, Norzah Ghani dan Cheah Kim Hock serta Rajendran Velu.

Mereka menerima hadiah RM5,000, trofi dan sijil penghargaan serta dilantik menjadi Duta Perpaduan oleh Jabatan Perpaduan Negara dan Integrasi Nasional.

Sementara itu, Pengerusi Pengurusan Anugerah MyHero 3.0, Datuk Richard Lau Chi Chiang berkata,

semua pemenang diharap akan terus mempromosikan mesej 'perpaduan kunci kemakmuran' kepada seberapa ramai rakyat Malaysia.

Menurutnya, pengundian dalam talian untuk MyHero atau MyHeroine yang paling popular kini sedang dijalankan menerusi laman Facebook <https://www.facebook.com/myheroaward/posts/1093361874197265>

"Kami berharap dapat melihat

lebih banyak pencalonan untuk MyHero Award 4.0 dan mereka yang tidak menang dalam MyHero Award 3.0 layak digalakkan untuk dicalonkan semula," katanya.

Dalam pada itu, beliau berkata, pihaknya menganjurkan Pertandingan Penulisan Esei untuk kanak-kanak sekolah rendah bagi menggalakkan mereka memberikan idea tentang Anugerah MyHero.



RICHARD